



11/11/2024



MES 0 24 0001443755

გადაწყვეტილება

ა(ა)იპ - ნიუ ვიჟენ უნივერსიტეტის "მულტიმედია ჟურნალიზმის" საბაკალავრო
საგანმანათლებლო პროგრამისთვის პირობითი აკრედიტაციის მინიჭების შესახებ

1. გადაწყვეტილების მიღების სამართლებრივი საფუძვლები

1.1 „უმაღლესი განათლების შესახებ“ საქართველოს კანონის 66-ე მუხლის პირველი პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტისა და საქართველოს განათლებისა და მეცნიერების მინისტრის 2011 წლის 4 მაისის №65/ნ ბრძანებით დამტკიცებული „საგანმანათლებლო დაწესებულებების საგანმანათლებლო პროგრამების აკრედიტაციის დებულების“ (შემდგომში - აკრედიტაციის დებულების) 27² - ე მუხლის პირველი პუნქტის მიხედვით, საგანმანათლებლო პროგრამების აკრედიტაციის საბჭო (შემდგომში - საბჭო) სააკრედიტაციო დოკუმენტაციის, აკრედიტაციის ექსპერტთა ჯგუფის დასკვნის, დაწესებულების მიერ აკრედიტაციის ექსპერტთა ჯგუფის დასკვნის პროექტზე წარმოდგენილი არგუმენტირებული პოზიციის შესწავლისა და ზეპირი მოსმენის გამართვის საფუძველზე იღებს გადაწყვეტილებას საგანმანათლებლო დაწესებულების საგანმანათლებლო პროგრამების აკრედიტაციის თაობაზე. აკრედიტაციის დებულების 27⁵ - ე მუხლის მე-5 პუნქტის თანახმად, საბჭო ვალდებულია დაასაბუთოს მის მიერ მიღებული გადაწყვეტილება.

1.2. „განათლების ხარისხის განვითარების შესახებ“ საქართველოს კანონის 22-ე მუხლის მე-2 პუნქტის „ბ“ ქვეპუნქტისა და აკრედიტაციის დებულების 27⁵ მუხლის პირველი პუნქტის „ბ“ ქვეპუნქტის შესაბამისად, საგანმანათლებლო პროგრამის პირობითი აკრედიტაციის შესახებ გადაწყვეტილებას იღებს საბჭო, თუ „განათლების ხარისხის განვითარების შესახებ“ საქართველოს კანონის 22-ე მუხლის მე-5 და მე-9 პუნქტების და აკრედიტაციის დებულების 27⁶ -ე მუხლის პირველი პუნქტის „გ“ ქვეპუნქტის თანახმად, საგანმანათლებლო პროგრამა სრულად ვერ აკმაყოფილებს აკრედიტაციის სტანდარტებს, კერძოდ, თუ საბჭოს მიერ საგანმანათლებლო პროგრამა აკრედიტაციის სტანდარტებთან შესაბამისობის შეფასებისას: ერთ სტანდარტთან მიმართებით მაინც შეფასდა, როგორც „ნაწილობრივ შესაბამისობაშია სტანდარტის მოთხოვნებთან“ და არცერთ სტანდარტთან მიმართებით არ შეფასდება, როგორც „არ არის შესაბამისობაში სტანდარტის მოთხოვნებთან“.

1.3. „განათლების ხარისხის განვითარების შესახებ“ საქართველოს კანონის 22-ე მუხლის მე-5 პუნქტისა და აკრედიტაციის დებულების 27⁶ - ე მუხლის მე-4 პუნქტის მიხედვით, პირობითი აკრედიტაციის ვადაა არაუმეტეს 4 წელი.

2. აღწერილობითი ნაწილი და დასაბუთება

2.1 სსიპ - განათლების ხარისხის განვითარების ეროვნულ ცენტრში (შემდგომში - ცენტრი) 2024 წლის 26 იანვარს წარმოდგენილ იქნა ა(ა)იპ - ნიუ ვიჟენ უნივერსიტეტის 2024 წლის 26 იანვრის

წერილი № 2024/154 (ცენტრში რეგისტრაციის - №77125 26/01/2024 და №85022; 29/01/2024), რომლითაც დაწესებულებამ წარმოადგინა სააკრედიტაციო განაცხადი "მულტიმედია ჟურნალიზმის" საბაკალავროსაგანმანათლებლო პროგრამის აკრედიტაციის თაობაზე.

2.2. ცენტრის დირექტორის 2024 წლის 14 თებერვლის №146403 ბრძანების საფუძველზე, ა(ა)იპ - ნიუ ვიჟენ უნივერსიტეტი ცნობილ იქნა აკრედიტაციის მაძიებლად. ცენტრის დირექტორის 2024 წლის 16 აპრილის №433997 ბრძანების საფუძველზე შეიქმნა ექსპერტთა ჯგუფი, რომელმაც დაწესებულებაში ვიზიტი "მულტიმედია ჟურნალიზმის" საბაკალავრო საგანმანათლებლო პროგრამის შეფასების მიზნით განახორციელა 2024 წლის 23 მაისს. ექსპერტთა ჯგუფის მიერ წარმოდგენილი დასკვნის შესაბამისად, სააკრედიტაციოდ წარმოდგენილი პროგრამა შეფასდა შემდეგნაირად:

სტანდარტები	შესაბამისობაშია მოთხოვნებთან	მეტწილად შესაბამისობაშია მოთხოვნებთან	ნაწილობრივ შესაბამისობაშია მოთხოვნებთან	არ არის შესაბამისობაში მოთხოვნებთან
1. საგანმანათლებლო პროგრამის მიზანი, სწავლის შედეგები და მათთან პროგრამის შესაბამისობა		x		
2. სწავლების მეთოდოლოგია და ორგანიზება, პროგრამის ათვისების შეფასების ადეკვატურობა	x			
3. სტუდენტთა მიღწევები, მათთან ინდივიდუალური მუშაობა	x			
4. სწავლების რესურსებით უზრუნველყოფა	x			
5. სწავლების ხარისხის განვითარების შესაძლებლობები		x		

2.3. საბჭომ შეისწავლა საგანმანათლებლო პროგრამების აკრედიტაციასთან დაკავშირებული დოკუმენტაცია, კერძოდ, თვითშეფასების ანგარიშსა და მასზე თანდართულ დოკუმენტაციაში ასახული ინფორმაცია, ექსპერტთა ჯგუფის დასკვნა, ექსპერტთა ჯგუფის დასკვნის პროექტზე აკრედიტაციის მაძიებლის მიერ ცენტრისთვის წარმოდგენილი არგუმენტირებული პოზიცია. ზეპირი მოსმენა გაიმართა 2024 წლის 01 ნოემბერს.

2.4 1.2 და 1.4 კოპონენტში საბჭომ დაამატა რეკომენდაციები და გაცემული რეკომენდაციების გადახედვის, გაანალიზებისა და ურთიერთშეჯერების საფუძველზე, ორივე კომპონენტი ნაცვლად „მეტწილად შესაბამისობაშია სტანდარტის მოთხოვნებთან“, შეაფასა, როგორც

„ნაწილობრივ შესაბამისობაშია სტანდარტის მოთხოვნებთან“. შესაბამისად, პირველი სტანდარტი ნაცვლად „მეტწილად შესაბამისობაშია სტანდარტის მოთხოვნებთან“, განისაზღვრა როგორც „ნაწილობრივ შესაბამისობაშია სტანდარტის მოთხოვნებთან“.

3. სარეზოლუციო ნაწილი

„უმაღლესი განათლების შესახებ“ საქართველოს კანონის 66-ე მუხლის პირველი პუნქტის, მე-2 პუნქტის „ბ“ ქვეპუნქტის, მე-3 და მე-5 პუნქტების, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტის, მე-2 პუნქტის „ბ“ ქვეპუნქტის, მე-5 და მე-9 პუნქტების, აკრედიტაციის დებულების 27² მუხლის პირველი პუნქტის, 27⁵ - ე მუხლის პირველი პუნქტის „ბ“ ქვეპუნქტისა და მე-5 პუნქტის, 27⁶ - ე მუხლის პირველი პუნქტის „გ“ ქვეპუნქტის, „საჯარო სამართლის იურიდიული პირის - განათლების ხარისხის განვითარების ეროვნული ცენტრის საქმისწარმოების წესისა და შინაგანაწესის დამტკიცების შესახებ“ სსიპ განათლების ხარისხის განვითარების ეროვნული ცენტრის დირექტორის 2011 წლის 01 ივნისის №223 ბრძანების მე-8 მუხლისა და საქართველოს ზოგადი ადმინისტრაციული კოდექსის 53-ე მუხლის შესაბამისად, აკრედიტაციის საბჭომ, კენჭისყრის შედეგად 16 ხმით არცერთის წინააღმდეგ,

გადაწყვეტა:

1. დაკმაყოფილდეს იქნა ა(ა)იპ - ნიუ ვიჟენ უნივერსიტეტის მიერ წარმოდგენილი სააკრედიტაციო განაცხადი და დანართი №1-ით გათვალისწინებულ "მულტიმედია ჟურნალიზმის" საბაკალავრო საგანმანათლებლო პროგრამას მიენიჭოს პირობითი აკრედიტაცია 2 წლის ვადით, 2026 წლის 11 ნოემბრამდე.
2. ცნობილ იქნას აკრედიტაციის ექსპერტთა ჯგუფის დასკვნა "მულტიმედია ჟურნალიზმის" საბაკალავრო საგანმანათლებლო პროგრამის შესახებ ამ გადაწყვეტილების განუყოფელ ნაწილად (დანართი № 2).
3. ცნობილ იქნას საბჭოს 2024 წლის 11 ნოემბრის სხდომის №1445451 ოქმის №01 ნაწილი ამ გადაწყვეტილების განუყოფელ ნაწილად (დანართი № 3).
4. დაწესებულებას შესასრულებლად განესაზღვრა შემდეგი რჩევები და რეკომენდაციები:

რეკომენდაციები:

- რეკომენდებულია სწავლის შედეგების ხელახალი ფორმულირება, ისე, რომ ხაზი გაუსვას მასობრივ კომუნიკაციას და არა მხოლოდ ჟურნალისტიკას;
- რეკომენდებულია სწავლის შედეგები სრულად მოვიდეს შესაბამისობაში სწავლის სფეროების კლასიფიკატორთან;
- პროგრამის სწავლის შედეგების შეფასების მექანიზმი უნდა განახლდეს პროგრამის სწავლის შედეგების გადამუშავებისა და პროგრამის სტრუქტურის განახლების შემდეგ;
- მასობრივი კომუნიკაციის საფუძვლები, ან შესავალი მასობრივ კომუნიკაციასა და ჟურნალისტიკაში, უნდა დაემატოს პროგრამას, როგორც პირველი კურსის პირველი სემესტრის სავალდებულო საგანი, მისანიჭებელი კვალიფიკაციის მიხედვით.
- შემოთავაზებული პროგრამის სტრუქტურა უნდა გადაიხედოს და ძირითადი სწავლის სფეროსთვის, ანუ მასობრივი კომუნიკაციისთვის შესაფერის საგნებს, ნაცვლად არჩევითისა, მიენიჭოს სავალდებულო სტატუსი.

- რეკომენდებულია, პროგრამაში სავალდებულოდ ისწავლებოდეს სასწავლო კურსები მასობრივი კომუნიკაციის სფეროს შემადგენელი დარგების/საკომუნიკაციო არხების შესახებ: ბეჭდური, აუდიო, ტელემედია, ციფრული მედია; ასევე კინო, ბრენდინგი, რეკლამა, საზოგადოებასთან ურთიერთობა.
- რეკომენდებულია, სავალდებულო კურსებად პირველსავე სემესტრებში ისწავლებოდეს: მასობრივი კომუნიკაციის შესავალი კურსი, აგრეთვე კურსი მასობრივი კომუნიკაციის თეორიების შესახებ, რაც სტუდენტს დაეხმარება, მიიღოს საფუძვლიანი ცოდნა სფეროს არსის შესახებ და წარმატებით შეასრულოს საბაკალავრო ნაშრომი.
- წარმოდგენილი სილაბუსები საჭიროებს დახვეწას და გადახედვას. მათში აღწერილი უნდა იყოს დამოუკიდებელი მუშაობისთვის განკუთვნილი აქტივობები, უნივერსიტეტის სილაბუსის ფორმის მოთხოვნების შესაბამისად.
- ყველა სილაბუსი მოითხოვს სავალდებულო ლიტერატურის ჩამონათვალს როგორც ინგლისურ, ასევე ქართულ ენებზე.
- სილაბუსებში მკაფიოდ უნდა იყოს წარმოდგენილი გამოცდებისა და შეფასებების სისტემა, მათ შორის გამოცდების ტიპი, ქულების განაწილება და შეფასების კრიტერიუმები, უნივერსიტეტის სილაბუსის ფორმის მოთხოვნების შესაბამისად.
- პროგრამის შემდგომი განვითარებისთვის რეკომენდებულია დეტალური და ყოვლისმომცველი გარე შეფასება.

რჩევა:


- პროგრამის შემუშავებისთვის მიზანშეწონილია დარგობრივი მიმართულებით დოქტორის ხარისხის მქონე მეტი კადრის ჩართვა;
- პროფესორებისთვის დამატებითი ტრენინგების მოწყობა კვლევითი ნაშრომების შემუშავებაზე, რომლებიც განკუთვნილია გლობალურად ცნობილ სამეცნიერო ჟურნალებში გამოსაქვეყნებლად, როგორიცაა Scopus-ში ჩამოთვლილი ჟურნალები, მნიშვნელოვნად გააუმჯობესებს პროგრამას;
- სასურველია სტუდენტებს, რომელთაც სურთ მიიღონ ბაკალავრის ხარისხი მასობრივ კომუნიკაციაში, შესთავაზონ არჩევითი საგნები, როგორიცაა ბრენდინგი, კოპირაითინგი და კრეატიული კომუნიკაცია;
- სასურველია NVU-მ ხელი მოაწეროს მემორანდუმებს პროფესიული სტაჟირების შესახებ როგორც მედია ორგანიზაციებთან, ასევე სახელმწიფო და კერძო სტრუქტურებთან, რათა ამ პროგრამის სტუდენტებს მისცენ შესაძლებლობა მიიღონ სტაჟირება რეალურ სამუშაო ადგილებზე. ასევე, პროგრამას უნდა დაემატოს პროფესიული სტაჟირება (თუნდაც არჩევითი სტატუსით);
- ხარისხის კულტურის კომიტეტმა სილაბუსები უფრო ყურადღებით განიხილოს არსებული ხარვეზების აღმოსაფხვრელად.

5. საბჭოს აღნიშნული გადაწყვეტილება ძალაში შევიდეს 2024 წლის 11 ნოემბერს.

6. საბჭოს მიერ მიღებული გადაწყვეტილება, საქართველოს ზოგადი ადმინისტრაციული კოდექსის 180-ე მუხლის პირველი ნაწილისა და „განათლების ხარისხის განვითარების შესახებ“ საქართველოს კანონის 24¹-ე მუხლის პირველი პუნქტის შესაბამისად, საგანმანათლებლო

დაწესებულების მიერ შეიძლება გასაჩივრდეს სააპელაციო საჩივრის სააპელაციო საბჭოში წარდგენის გზით შემდეგ მისამართზე: ქ. თბილისი, მ. ალექსიძის II შესახვევი №2, ან თბილისის საქალაქო სასამართლოს ადმინისტრაციულ საქმეთა კოლეგიაში სარჩელის შეტანის გზით შემდეგ მისამართზე: ქ. თბილისი, დავით აღმაშენებლის ხეივანი №64, აღნიშნული გადაწყვეტილებისა და მისი დასაბუთებითი ნაწილების (დანართი №1, დანართი №2, დანართი №3) ცენტრის ვებ-გვერდზე (www.eqe.ge) გამოქვეყნების დღიდან, ერთი თვის ვადაში.

საგანმანათლებლო პროგრამების აკრედიტაციის საბჭო
მდივანი
ტეფნაძე დავით



საგანმანათლებლო პროგრამების აკრედიტაციის საბჭო
საბჭოს თავმჯდომარე
ლომინაძე თამარ

